

Islam Di Antara Kejahilan Pemeluknya Dan Kelemahan Ulamanya

Di dalam pemerintahan Islam hari ini, tidak ada didapati dasar kemerdekaan, tidak ada persamaan dan tidak ada keadilan dalam erti kata yang sebenarnya menurut kaca mata Islam. Dasar-dasar kerajaan-kerajaan Islam telah banyak menyeleweng meninggalkan perkara-perkara yang diwajibkan oleh Islam. Tidak ada semangat tolong-menolong di antara orang-orang Muslimin, tidak ada roh perpaduan dan tidak ada perasaan belas kasihan di antara sesama manusia. Malahan segala apa yang diharamkan oleh Islam itulah yang digalakkan. Perbuatan-perbuatan anaya, zalim, tindas-menindas, rasuah dan rompak samun semakin bermahrajalela di dalam negeri-negeri Islam, sehingga orang-orang Islam sendiri hidup di dalam suatu masyarakat yang dipenuhi dengan fasad, maksiat dan mungkar.

Terjemahan bebas oleh: Azmi

(XIV)

Siapa yang bertanggungjawab

dengan keadaan kita sekarang?

Seluruh umat Islam adalah sama-sama memikul tanggungjawab di atas segala kelemahan dan kehinaan yang sedang menyeludup masuk ke dalam masyarakat hidup mereka pada hari ini. Meskipun tanggungjawab-tanggungjawab itu merupakan suatu beban yang bertingkat-tingkat menurut taraf kedudukan masing-masing tetapi setiap kaum Muslimin tidak boleh melepaskan diri daripada memikul bebanan dan tanggungjawab yang besar ini.

Tanggungjawab orang ramai:

Orang ramai Islam bertanggungjawab di atas kejahilan, kefasikan dan kekufuran saudara-saudara mereka, mereka bertanggungjawab di atas kemiskinan, hidup di bawah penjajahan dan tertindas di bawah kekuasaan pemerintah yang zalim yang sedang dialami oleh saudara-saudara mereka di seantero dunia. Seluruh umat Islam bertanggungjawab di atas segala kejadian-kejadian ini. Semua kejadian ini

adalah berpunca daripada kejahilan penganut-penganut Islam sendiri terhadap pengajaran-pengajaran agama mereka yang terkandung di dalam al-Qur'an al-Karim dan al-Hadith al-Sharīf. Dengan sebab kejahilan-kejahilan inilah yang melibatkan mereka menyeleweng sedikit demi sedikit daripada landasan pengajaran-pengajaran Islam yang sebenarnya sehingga dengan tiada mereka sedari mereka telah tergelincir jauh daripada dasar-dasar hukum Islam, agama yang mereka anuti dari turun-temurun.

Sungguhpun segolongan besar daripada kaum Muslimin di hari ini telah terjerumus ke lembah kefasikan, kekufuran dan *ilhād*,* sedang mereka menyangka yang diri mereka itu tidak melakukan sebarang perbuatan yang bertentangan dengan ajaran-ajaran Islam, atau mereka menyangka bahawa Islam itu suatu agama yang tidak menentang fahaman fistik, kufur dan *ilhād*. Mereka sama sekali tidak mengetahui bahawa agama Islam itu mewajibkan supaya sekalian kaum muslimin memperdalam

ilmu pengetahuan yang bersangkutan dengan kemajuan umat Islam di lapangan hidup di dunia serta ingat-memperingati di antara satu sama lain. Firman Allah di dalam *Sūrah al-Tawbah* ayat (122): ***"Falawlā nafara min kulli firqati minhum tā'ifatu liyatafaqqahū fi al-dīn wa liyundhirū qawmahum idhā raja'ū ilayhim la'allahum yaḥdhārūn"***. Maksudnya: “Mengapakah tiada berjalan sebahagian di antara tiap-tiap satu puak supaya mempelajari ilmu agama? Apabila mereka kembali bolehlah mereka memberi peringatan kepada kaumnya mudah-mudahan mereka itu sentiasa berhati-hati”.

Sebenarnya gerakan memperingati orang-orang Islam dengan secara dakwah (dari suatu kampung ke suatu kampung, dari suatu negeri ke suatu negeri – P.) telah lama dijalankan oleh puak-puak orang Islam yang berjiwa agama dengan tujuan untuk mengajar mereka dalam soal hukum agama yang sebenarnya. Tetapi itu mendukacitakan kerana setengah daripada kerajaan-kerajaan Islam sendiri merasa

* ***Ilhād***: suatu fahaman yang tidak percayakan adanya Tuhan (Atheism).

Islam Di antara Kejahanan

curiga dengan gerakan yang seumpama ini, sehingga puak mubaligh-mubaligh Islam yang benar-benar bertujuan suci menjalankan dakwah Islamiyah terus disekat usaha-usaha mereka. Kecergasan untuk memperkembangkan ajaran-ajaran Islam diburui, tetapi kecergasan untuk memperkembangkan ajaran-ajaran syaitan digalakkan. (Inilah dasar yang dijalankan oleh setengah daripada negara-negara Islam pada hari ini – P). Yang amat menyediakan ialah sebahagian besar daripada umat Islam sendiri mendiamkan diri seolah-seolah mereka turut sama menyukai di atas segala perkara mungkar yang sedang berlaku di hadapan mata mereka. Dengan sikap ini bererti orang ramai bekerjasama dengan kerajaan-kerajaan Islam yang memburu dan mencurigai usaha-usaha memperkembangkan ajaran-ajaran agama di kalangan rakyat jelata untuk mencekik Islam dan menghapuskan pergerakan-pergerakan yang mendukung kesucian dan kemuliaan agama Islam.

Orang-orang Islam pada hari ini telah hilang kekuatan, hilang kemuliaan dan hilang sifat-sifat ketinggian. Mereka menjadi hamba kepada si gagah, menjadi abdi kepada penjajah dan menjadi pengampu pegawai-pegawai tinggi pemerintah. Tenaga mereka diperas, kemuliaan mereka diinjak-injak dan kemerdekaan mereka ditindas. Pada hal mereka harus kuat, harus mulia dan kedudukan mereka harus lebih tinggi daripada umat-umat yang lain, lantaran mereka menjadi penganut agama yang kuat, agama yang mulia dan agama yang tinggi. Kalau mereka

akan kembali berpegang teguh dengan ajaran-ajaran Islam, maka tidak syak lagi mereka akan kembali menjadi suatu umat yang kuat, umat yang gagah dan mulia.

Orang-orang Islam pada hari ini telah menjadi suatu umat yang lalai, lalai di dalam urusan agama, lalai di dalam urusan dunia dan lalai kepada kewajipan diri mereka sendiri. Nanti pada hari Tuhan bukakan mata hati mereka, di sana kelak baharu mereka sedar, baharu mereka ingat dan baharu mereka ketahui yang mereka di dalam kerugian. Rugi di dunia dan rugi di akhirat. Lantaran apa? Lantaran mereka menjauahkan diri daripada suruhan-suruhan Allah, mereka menyeleweng daripada ajaran yang dibawa oleh Kitab Allah.

Tanggungjawab kerajaan Islam:

Kerajaan-kerajaan Islam adalah mempunya tanggungjawab yang besar dengan penyakit kelemahan yang sedang dihidapi oleh Islam. Pada hari ini, ia bertanggungjawab pula di atas penyakit kehinaan dan kehancuran yang sedang dialami oleh seluruh umat Islam di seantero pelosok dunia Islam pada abad yang kedua puluh ini.

Kerajaan-kerajaan Islam lah yang menjauhkan Islam daripada urusan-urusan hidup. Ia telah menggalakkan supaya orang-orang Islam yang di bawah kekuasaannya melakukan perbuatan-perbuatan yang dilarang Allah dengan menjalankan hukum-hukum selain daripada hukum-hukum Allah.

Kerajaan-kerajaan Islam sendirilah yang telah menceburkan kaum muslimin ke jurang kesesatan ala Eropah dan menjauhkan mereka daripada hidayah dan pertunjuk Tuhan, dengan cara menghukum mereka dengan hukuman-hukuman yang

diciptakan oleh orang-orang Barat, tidak menjalankan hukum-hukum yang diturunkan Allah mengikut dasar hukuman yang terkandung di dalam syariat Islam.

Sesungguhnya kerajaan-kerajaan Islam telah terkeluar daripada dasar-dasar Islam dari segi hukum, politik dan pentadbiran, telah terkeluar daripada konsep-konsep Islam yang sejati. Di dalam pemerintahan Islam hari ini tidak ada dasar kemerdekaan, tidak ada persamaan dan tidak ada keadilan dalam erti kata yang sebenarnya menurut kaca mata Islam. Dasar-dasar kerajaan-kerajaan Islam telah banyak menyeleweng meninggalkan perkara-perkara yang diwajibkan oleh Islam. Tidak ada semangat tolong-menolong di antara orang-orang Muslimin, tidak ada ruh perpaduan dan tidak ada perasaan belas kasihan, malahan apa yang diharamkan oleh Islam itulah yang digalakkan. Perbuatan-perbuatan anaya, zalim, tindas-menindas, rasuah dan rompak samun semakin bermaharaja lela di dalam negeri-negeri Islam, sehingga orang-orang Islam sendiri hidup di dalam masyarakat yang penuh dengan fasad, maksiat dan munkar.

Sesungguhnya kerajaan-kerajaan Islam – pada hari ini – telah tunduk kepada musuh-musuh Islam, sedang agama Islam melarang seseorang Islam itu tunduk kepada musuh-musuhnya. Dalam hal yang demikian banyak di antara orang-orang Islam tunduk taat kepada musuh-musuh Islam.

Kerajaan-kerajaan Islam lah yang menyebabkan kaum Muslimin menjadi suatu umat yang lemah dan terhina, hidup mereka sentiasa tertindas dan miskin, masyarakat mereka dikelubungi suasana fasad dan zalim.

Islam Di antara Kejahanan

Tanggungjawab ketua-ketua negara:

Ketua-ketua negara-negara Islam adalah di antara orang-orang yang mempunyai tanggungjawab yang besar sekali dengan perkembangan dan kemuliaan agama Islam, mereka bertanggungjawab pula dengan kelemahan dan kemerosotan Islam pada hari ini. Apabila undang-undang negeri melepaskan mereka daripada segala tanggungjawab, maka Islam tidak akan melepaskan mereka itu daripada sebarang tanggungjawab, dari sekecil-kecil perkara hingga sebesar-besarnya mereka akan ditanya di hadapan Tuhan di hari akhirat kelak.

Wahai ketua-ketua negara Islam! Sesungguhnya di tangan kamu terletaknya hukum dan kekuasaan. Kamu mempunyai kekuatan dan kamu mempunyai kekuasaan untuk mengembalikan Islam ke zamannya yang gemilang. Tetapi kamu mewarisi daripada orang-orang sebelum kamu suatu kerajaan yang dasar konsepnya bertentangan dengan dasar dan konsep Islam, dengan dasar inilah kamu hidup dan di atas konsep inilah kamu menjalankan pemerintahan, sama ada kamu ketahui atau tidak, dasar dan konsep yang kamu warisi itu adalah bertentangan dengan Islam. Konsep beku yang kamu warisi daripada datuk nenek kamu itulah sebab yang pertama menjadikan Islam lemah dan menjadikan pemeluk-pemeluknya suatu umat yang mundur, beku tak bergerak. Kemunduran dan kelemahan Islam itu adalah tanggungjawab kamu. Kekuatan dan kemuliaan Islam itu adalah kekuatan dan kemuliaan

kamu. Alangkah baiknya jika kamu menjadi ketua-ketua negara yang kuat gagah daripada menjadi ketua-ketua negara yang lemah, ketua-ketua negara yang tunduk di bawah telunjuk seorang pegawai kecil yang didatangkan dari negara penjajah, yang berkuasa memerintah dan menegah, yang berkuasa mengguling dan menegakkan sesebuah kerajaan, yang berkuasa menggoyang takhta dan yang berkuasa menggegarkan lutut raja-raja dan amir-amir.

Sesungguhnya kamu adalah ketua-ketua negara yang bepecah belah! Demi untuk kebaikan diri kamu dan kebaikan Islam, seyogialah kamu mempersatukan kekuatan kamu. Sesungguhnya kamu berpuak-puak dan bersuku-suku. Demi untuk kebaikan diri kamu dan kebaikan Islam agama yang kamu anuti, seyogiyalah kamu bertolong-tolongan dan bersatu-padu. Kamu lebih dipandang baik jika kamu tunduk dan bertolong-tolongan di antara sesama kamu menjalankan urusan pemerintahan, daripada kamu tunduk kepada penjajah dan kerajaan-kerajaan kamu dikendalikan oleh kaum Imperialis.

Wahai ketua-ketua negara Islam! Letakkanlah Islam itu di atas segala sesuatu, jadikanlah Islam undang-undang untuk diri kamu, jadikanlah dia asas kerajaan kamu, di atas dasar-dasar hukumnya, dirikanlah negara Islam. Janganlah kamu jadikan diri kamu sebagai batu yang terhempas ke bumi di dalam perjuangan menegakkan negara Islam. Ingatlah! Kamu akan menemui mati, sesudah mati kamu akan menemui dua perkara: sama ada syurga atau pun neraka. Pada ketika itu kerajaan kamu, harta benda kamu

dan kaum keluarga kamu tidak akan dapat monolong kamu, hanya yang akan menolong kamu ialah amal kamu yang soleh, amal yang berdasarkan perintah-perintah Allah. Sebaik-baik kamu ialah sebagai orang yang tercatit jasa-jasa cemerlang kamu di dalam sejarah, sebagai ketua-ketua negara yang telah berjuang mengembalikan Islam kepada zamannya yang gemilang sebagai pemimpin-pemimpin yang telah berkorban mengembalikan hukum-hukum syariat diperkuatkuasakan semula di dalam negara-negara Islam.

Semua perkara ini tidak akan dapat dilaksanakan melainkan dengan azam dan cita-cita yang kuat, dengan semangat yang teguh dan dengan mengatasi segala kelemahan yang ada pada diri kamu. Jika kelemahan dapat mengatasi kamu, maka segala cita-cita akan menjadi hancur lebur. Manakala cita-cita kamu – sebagai ketua-ketua negara Islam – lebur, maka selama itulah keadaan hidup seluruh umat Islam menjadi lemah, berpecah belah dan terhina, kamu dan sekalian rakyat jelata yang di bawah naungan kamu akan ditindas oleh kuasa-kuasa besar yang lebih kuat daripada kamu, kemuliaan hidup kamu akan dinodai oleh kaum penjajah dan kamu sentiasa diperkotak-katikkan oleh negara-negara yang mempunyai kekuasaan besar, negara-negara yang mengetahui bahawa bersatu padu itu adalah kuat dan kemenangan itu sentiasa berada di dalam tangan orang yang kuat.

Wahai ketua-ketua negara Islam! Janganlah kamu tamakkan kebesaran dan kekuasaan, jangan kamu bergantung kepada nama dan pangkat. Sesungguhnya sifat tamak itulah yang menjatuhkan umat Islam, yang menjadikan roh

Islam Di antara Kejahanan

keislaman mereka lemah. Apabila roh keislaman mereka lemah, mereka dengan mudah ditakluk, diperhamba dan dicerobohi oleh musuh mereka, lantaran mereka tak berdaya untuk mempertahankan diri. Hingga sebagaimana yang kita mempersaksikan pada hari ini keadaan umat Islam yang mempunyai banyak bilangan, yang memiliki bumi yang luas, bumi mereka mengeluarkan bahan-bahan mentah – yang sepatutnya mereka menjadi suatu umat yang mulia dan gagah – telah menjadi sebaliknya, tegasnya mereka telah menjadi selemah-lemah dan sehina-hina umat yang hidup di permukaan alam ini.

Manakala sifat haloba dan tamak kepada pangkat kebesaran ini dapat kamu singkirkan dari jiwa kamu, maka tanamkanlah pula perasaan mahu bersatu-padu untuk mengumpul kekuatan, sehingga keseluruhan umat Islam menjadi suatu umat yang gagah perkasa.

Ketahuilah wahai ketua-ketua negara Islam! Bahawa sesungguhnya jawatan dan pangkat kebesaran kamu tidak memberikan sesuatu bekas di atas kebesaran Allah *Subḥānahu wa Ta’ālā*. Allah akan menyoal kamu tentang agama Islam dan orang-orang Muslimin yang di bawah penjagaan kamu. Kamu akan disoal tentang Islam, mengapa Islam telah menjadi suatu agama yang dagang di dalam negeri Islam yang kamu perintah? Mengapa kamu cuaikan hukum-hukum syariat yang dibawanya? Kemudian kamu akan disoal pula keadaan

orang-orang Muslimin yang di bawah pemerintahan kamu, kamu akan disoal tentang kekuatan dan kelemahan mereka, tentang perpaduan dan perpecahan mereka. Kamu akan disoal mengapa mereka lemah, mengapa hidup mereka terhina, mengapa semakin berkurangnya pahlawan-pahlawan agama yang memperjuangkan Islam dan mengapa banyak bilangan pengampu-pengampu yang melembutkan gigi dari lidahnya.

Wahai ketua-ketua negara Islam! Janganlah kamu tamakkan pangkat dan kekuasaan, kerana sesungguhnya Nabi Muhammad (S.A.W) telah bersabda yang maksudnya “Sesungguhnya kamu suatu umat yang tamakkan pangkat kebesaran dan kamu akan menyesal pada hari kiamat kelak, berbahagialah ibu susuan dan rugilah Fatimah.”

Ketahuilah oleh kamu! Bahawa pangkat kebesaran yang kamu sandang itu adalah amanat. Barangsiapa yang memegang amanah itu hendaklah ditunaikan haknya. Barangsiapa yang menuaikan hak amanahnya ia akan selamat pada hari kiamat nanti. Oleh itu hendaklah kamu tunaikan amanah-amanhah yang kamu pikul itu kepada orang yang berhak menerima kerana Allah akan menyoal kamu tentang amanah. Ingatlah kepada sabda Rasulullah *ṣallā Allāhu ‘alayhi wa sallam* kepada Abu Dhar: Wahai Abu Dhar! Sesungguhnya engkau seorang lelaki yang lemah. Bahwasanya pangkat kebesaran itu adalah suatu amanah. Pada hari kiamat kelak semua orang akan terhina dan menyesal, melainkan orang-orang yang menyimpan amanah dan memberikannya kepada yang punya haknya.”

Bersambung

Kata-kata Hikmah

Kekayaan itu adalah sebagai air hujan; semakin banyak kita minum semakin terasa haus. Demikian juga dengan kemasyhuran. – (Imam Ghazali).

* * *

Kalau seorang yang berhak selalu melakukan kekeliruan, nescaya di belakangnya akan terdapat banyak orang yang bodoh yang mengulangi kekeliruan itu. – (Beng Chu)

* * *

Luka yang disebabkan oleh sebatang anak panah akan meninggalkan kesan dan sembah. Sebatang pohon yang ditumbangkan oleh sebuah kapak akan tumbuh kembali; tetapi luka hati yang disebabkan oleh lidah akan tetap selamanya berkesan tidak akan sembah-sembuhnya. (al-Hakim).

Siri Kesah

Tokoh2 Sejarah IV

GABNOR dan HAKIM

sa-buah 60 sen.

belanja Pos 10 sen.

—
Siri Kesah

Tokoh2 Sejarah V

DUSTA YAHUDI

Harga 40 sen.

Pos 10 sen.

Pesan-lah kapada:

QALAM

8247, Jalan 225,

Petaling Jaya,

Selangor.